



Газет 1988 жылдың
1 шілдесінен бастап
шығады

АЛМАТЫ ҚАЛАСЫ ӘКІМДІГІ
МЕН ҚАЛАЛЫҚ МӘСЛИХАТТЫҢ
РЕСМИ БАСЫЛЫМЫ



БАСТЫ БЕТ АҚШАМ-АҚПАРАТ ШАҒАР ШАРУАШЫЛЫҒЫ ҚАЛА ЖӘНЕ ИМАН РУХАНИЯТ ДӘРУГЕР СПОРТ БАСҚА

Сайттан

ҚАНАҒАТШЫЛ, МЕЙІРБАН АДАМДАР ҰЗАҚ ЖАСАЙДЫ

АҚШАМ-АҚПАРАТ / 21.12.2015, 13:12 / 44 РЕТ ОҚЫЛДЫ

Алла сыйласа – жас береді, адам сыйласа – ас береді. Пейілі кең, жан-жағына шуақ шашатын мейірбан, қанағатшыл адамдар ұзақ жасайтын сыңайлы. Сондай жаны жайсаң жандардың бірі – жүз жасаған кейуана Нұрхан Бәтешқызы Ахмедова.

Бұл кісі қазақ кенінің қара ордасы, қасиетті Қарсақбай өңірінде 1915 жылғы 21 желтоқсанда дүние есігін ашқан. «Жеріне қарап дән өседі, тегіне қарап жан өседі» дегендей, текті

атадан тараған Найман бабаның ұрпағы. Қазақта «Жылқының жақсысы — жайлауда, қыз жақсысы – Найманда» деген де тәмсіл бар.

Сол текті жерден шыққан талапшыл қыз Мәскеу темір жол көлігі институтын ойдағыдай тәмамдап, туған еліне келіп, атақты Түркісібте жұмыс істейді. «Асыл пышақтың қын түбінде жатпайтыны» сияқты, білікті маман, іскер қызметкер езінің ұйымдастырушылық қабілетімен көзге түсіп, Қазақстан ЛКЖО Орталық комитетінің хатшысы болып сайланады. Бұл Ұлы Отан соғысының қайнаған жылдары еді. Жас хатшы бастама көтеріп, жастарды Қазақстан танк колоннасын жасақтауға жұмылдырады. Республика өрендері сенбіліктер мен жексенбіліктер ұйымдастырады, кешкілік жұмыстан соң да еңбек етеді, сөйтіп бір жылдың ішінде 11,5 млн. рубльден аса қаражат жинайды.

Нұрхан Ахмедова Қызылорда облыстық комсомол комитетінің сол кездегі бірінші хатшысы Нағашыбай Нұрпейісовпен бірге Мәскеуге барып, КСРО Қорғаныс министрлігі арқылы мұздай қаруланған танкілер сатып алып,

алдыңғы шепте-шайқасып жатқан жауынгерлерге табыс етеді.

«Қазақстан комсомолы» танк бөлімшесінің сайыпқырандары Бірінші Беларусь майданының құрамында талай ерліктер көрсетіп, Берлин шайқасына қатысады, сөйтіп неміс фашистерін тізе бүктіруге үлес қосады.

Бұл Нұрхан Бәтешқызының ерлігінің бір қыры.

Соғыс жеңіспен аяқталған соң Н.Ахмедова Қазақстан Ғылым академиясының негізін қалаушы, дүние жүзіне мәшһүр ғұлама ғалым Қаныш Имантайұлы Сәтбаевтың шақыруымен отыз жыл бойы Қазақ КСР Ғылым академиясының орталық ғылыми кітапханасын басқарады.

Еңбек ете жүріп, зерттеу жұмыстарымен айналысып, экономика ғылымдарының докторы, профессор атағын алып, халық шаруашылығы институтында болашақ мамандарға дәріс береді, экономист кадрлар даярлауға атсалысады.

Нұрхан Бәтешқызы Ихсан Қадырбеков сынды қазақтың абзал азаматымен тұрмыс құрады. Ол кісі көп жылдар бойы Алматы облыстық партия комитетінің ауыл шаруашылығы бөлімін басқарады, Мәскеудегі Бүкілодақтық Халық шаруашылығы көрмесінде Қазақстан павильонының директоры қызметін табыспен атқарады.

Тату-тәтті отбасы Бақыт, Гүлжәмила есімді екі перзент тәрбиелеп өсіреді. Тұңғышы Бақыт Ихсанқызы – Абай атындағы педагогикалық университеттің доценті, ғылым кандидаты. Гүлжәмила – белгілі өнер майталманы, ҚР халық әртісі, өнертану ғылымының докторы, Құрманғазы атындағы консерваторияның профессоры, Италияда өткен халықаралық пианистер байқауының тұңғыш жеңімпазы.

Нұрхан Ахмедованың ел алдындағы ерен еңбегі еленіп, ол «Құрмет белгісі», «Халықтар достығы», ордендерімен, 8 медальмен марапатталған, Қазақ КСР Жоғарғы Кеңесінің депутаты болып сайланған.

Ұлағатты ұлтының бойтұмарына айналған Нұрхан кейуана бір ғасыр ғұмыр жасап, қадір-қошеметке ие болып отыр. Бостандық ауданының Ардагерлер кеңесі он бес жылдан бері «Ғасыр құрдастары» атты акция өткізіп келеді. Осы шара аясында аудан әкімі Бекқали Нұрғалиұлы Торғаев Нұрхан Бәтешқызының дәл туған күні – 21 желтоқсанда кейуананың үйіне барып, мерейтой иесіне тағзым етіп, құттықтап, сый-сияпат жасады, ізгі тілектерін білдірді.

Жасай беріңіз, ақылгөй ана!

Х.БІРЖАНОВ,

Бостандық аудандық Ардагерлер кеңесінің төрағасы.